

皇甫司農集
鄭司農集
蔡中郎文集
附蔡中郎外傳



皇甫規撰

60393

皇甫司農集

皇甫規撰

中華書局

叢書集成初編

皇甫司農集（及其他二種）

中華書局出版發行

（北京王府井大街三十六號）

秦皇島市資料印刷廠印刷

一九九一年北京第一版

開本：七八七乘一〇九二毫米三十二分之一

統一書號：ISBN7—101—00894—1/K·367

皇甫司農集

漢書本傳

皇甫規字威明。安定朝那人也。祖父棧。度遼將軍。父旗。扶風都尉。永和六年。西羌大寇。三輔圍安定。征西將軍馬賢將諸郡兵擊之。不能克。規雖在布衣。見賢不郵軍事。審其必敗。乃上書言狀。尋而賢果爲羌所沒。那將知規有兵略。乃命爲功曹。使率甲士八百與羌交戰。斬首數級。賊遂退卻。舉規上計掾。其後羌衆大合。攻燒隴西。朝廷患之。規乃上疏求乞自効。云。時帝不能用。沖質之閒。梁太后臨朝。規舉賢良方正。對策云。梁冀忿其刺己。以規爲下第。拜郎中。託疾免歸。州郡承冀旨。幾陷死者再三。遂以詩易教授。門徒三百餘人。積十四年後。梁冀被誅。旬月之閒。禮命五至。皆不就。時泰山賊叔孫無忌。侵亂郡縣。中郎將宗資討之。未服。公車特徵。規拜泰山太守。規到官。廣設方略。寇患悉平。延熹四年秋。叛羌零吾等與先零別種寇鈔關中。護羌校尉段熲坐徵後先零諸種陸梁。覆沒營塢。規素悉羌事。志自奮効。乃上疏云。至冬。羌遂大合。朝廷爲憂。三公舉規爲中郎將。持節監關西兵討零吾等破之。斬首八百級。先零諸種羌慕規威信。相勸降者十餘萬。明年。規因發其騎共討隴右。而道路隔絕。軍中大疫。死者十三四。規親入菴廡。巡視將士。三軍咸悅。東羌遂遣使乞降。涼州復通。先是。安定太守孫雋受取狼籍。屬國都尉李翁。督軍御史張冀多殺降羌。涼州刺史郭閔。漢陽太守趙熹。竝老弱不堪任職。而皆倚恃權貴。不遵法度。規到州界。

悉條奏其罪。或免或誅。羌人聞之。翕然反善。沈氏大豪。滇昌饑恬等十餘萬口。復詣規降。規出身數年。持節爲將。擁衆立功。還督鄉里。旣無它私惠。而多所舉奏。又惡絕宦官。不與交通。於是中外竝怨。遂共誣規。貨賂羣羌。令其文降。天子璽書。請讓相。屬規懼不免。上疏自訟云云。其年冬。徵還拜議郎。論功當封。而中常侍徐璜。左悺欲從求貨。數遣賓客。就問功狀。規終不答。璜等忿怒。陷以前事。下之於吏。官屬欲賦斂。請謝。規視而不聽。遂以餘寇不絕。坐繫廷尉。論輸左校。諸公及太學生張鳳等三百餘人。詣闕訟之。會赦歸家。徵拜度遼將軍。至營數月。上書薦中郎將張奐。以自代云云。朝廷從之。以奐代爲度遼將軍。規爲使匈奴中郎將。及免。遷大司農。規復代爲度遼將軍。規爲人多意算。自以連在大位。欲退身避第。數上病。不見聽。會友人上郡太守王曼喪還。規縞素。越界到下亭迎之。因令客密告并州刺史胡芳。言規擅遠軍營。公違憲禁。營急舉奏。芳曰。威明欲避第仕塗。故激發我耳。吾當爲朝廷愛才。何能中此子計邪。遂無所問。及黨事大起。天下名賢。多見染逮。規雖爲名將。素譽不高。自以西州豪傑。恥不得豫。乃先自上言云云。朝廷知而不問。時人以爲規賢。在事數歲。北邊威服。永康元年。徵爲尙書。其夏日食。詔公卿舉賢良方正。下問得失。規對云云。對奏不省。遷規弘農太守。封壽城亭侯。邑二百戶。讓封不受。再轉爲護羌校尉。熹平三年。以疾召還。未至。卒于穀城。年七十一。所著賦銘碑讚禱文。弔章表。教令書檄牋記。凡二十七篇。

論曰。孔子稱其言之不作。則其爲之也難。察皇甫規之言。其心不作哉。夫其審己則干祿。見賢則委位。故干祿不爲貪。而委位不求讓。稱己不宜伐。而讓人無懼情。故能功成於戎狄。身全於邦家也。

皇甫司農集

賜進士出身翰林院庶吉士知四川屏山縣事張澍纂集

上順帝求自効疏

臣比年以來。數陳便宜。羌戎未勦。策其將反。馬賢始出。頗知必敗。誤中之言。在可考校。臣每惟賢等擁衆四年。未有成功。縣師之費。且百億計。出於平人。回入姦吏。故江湖之人。羣爲盜賊。青徐荒飢。樞負流散。夫羌戎潰叛。不由承平。皆由邊將失於綏御。乘常守安。則加侵暴。苟競小利。則致大害。微勝則虛張首級。軍敗則隱匿不言。軍士勞怨。困於猾吏。進不得快戰。以徼功。退不得溫飽。以全命。餓死溝渠。暴骨中原。徒見王師之出。不聞振旅之聲。會豪泣血。驚懼生變。是以安不能久。敗則經年。臣所以搏手叩心而增嘆者也。願假臣兩營二郡屯列坐食之兵五千。出其不意。與護羌校尉趙沖共相首尾。土地山谷。臣所曉習。兵勢巧便。臣已更之。可不煩方寸之印。尺帛之賜。高可以滌患。下可以納降。若謂臣年少官輕不足用者。凡諸敗將。非官爵之不高。年齒之不邁。臣不勝至誠。沒死自陳。後漢書

舉賢良方正對策

伏惟孝順皇帝初勤王政。紀綱四方。幾以獲安。後遭姦僞。威分近習。畜貨聚馬。戲謔是聞。又因緣嬖倖。受賂賣爵。輕使賓客。交錯其間。天下擾擾。從亂如歸。故每有征戰。鮮不挫傷。官民并竭。上下窮虛。臣在關西。

竊聽風聲。未聞國家有所先後。而威福之來。咸歸權倖。陛下體兼乾坤。聰哲純茂。攝政之初。拔用忠貞。其餘維綱。多所改正。遠近翕然。望見太平。而地震之後。霧氣白濁。日月不光。旱魃爲虐。大賊從橫。流血川野。庶品不安。譴誡累至。殆以姦臣權重之所致也。其常侍尤無狀者。亟便黜遣。披掃凶黨。收入財賄。以塞痛怨。以答天誠。今大將軍梁冀。河南尹不疑。處周召之任。爲社稷之鎮。加與王室。爲姻族。今日立號。雖尊可也。實宜增修謙節。輔以儒術。省去遊娛不急之務。割減廬第無益之飾。夫君者。舟也。人者。水也。羣臣。乘舟者也。將軍兄弟。操楫者也。若能平志畢力。以度元元。所謂福也。如其怠弛。將淪波濤。可不慎乎。夫德不稱祿。猶鑿墉之趾。以益其高。豈量力審功安固之道哉。凡諸宿猾。酒徒戲客。皆耳納邪聲。口出諂言。甘心逸遊。唱造不義。亦宜貶斥。以懲不軌。令冀等深思得賢之福。失人之累。又在位素餐。尙書怠職。有司依違。莫肯糾察。故使陛下專受諂諛之言。不聞戶牖之外。臣誠知阿諛有福。深言近禍。豈敢隱心。以避誅責乎。臣生長邊遠。希涉紫庭。怖懼失守。言不盡心。後漢書

上書自奮討零吾疏

自臣受任。志竭愚鈍。實賴兖州刺史牽顯之清猛。中郎將宗資之信義。得承節度。幸無咎譽。今猾賊就滅。大山略平。復聞羣羌竝皆反逆。臣生長邠岐。年五十有九。昔爲郡吏。再更叛羌。預籌其事。有誤中之言。臣素有固疾。恐犬馬齒窮。不報大恩。願乞冗官。備單車一介之使。勞來三輔。宣國威澤。以所習地形兵勢。佐助諸軍。臣窮居孤危之中。坐觀郡將已數十年矣。自鳥鼠至於東岱。其病一也。力求猛敵。不如清平。勤用

吳孫未若奉法。前變未遠。臣誠戚之。是以越職。盡其區區。後漢書

自訟疏

四年之秋。戎醜蠢戾。爰自西州。侵及涇陽。舊都懼駭。朝廷西顧。明詔不以臣愚驚。急使軍就道。幸蒙威靈。遂振國命。羌戎諸種。大小稽首。輒移書營郡。以訪誅納。所省之費一億。以爲忠臣之義。不敢告勞。故恥以片言自及。微効。然比方先事。庶免罪悔。前踐州界。先奏郡守孫雋。次及屬國都尉李翕。督軍御史張稟。旋師南征。又上涼州刺史郭閔。漢陽太守趙熹。陳其過惡。執據大辟。凡此五臣。支黨半國。其餘墨綬。下至小吏。所連及者。復有百餘。吏託報將之怨。子思復父之恥。載費馳車。懷糧步走。交構豪門。競流謗譟。云臣私報諸羌。謝其餞貨。若臣以私財。則家無擔石。如物出於官。則文薄易考。就臣愚惑。信如言者。前世尙遺匈奴。以宮姬。鎮烏孫。以公主。今臣但費千萬。以懷叛羌。則良臣之材略。兵家之所貴。將有何罪。負義違理乎。自永初以來。將出不少。覆軍有五。動資巨億。有旋車完封。寫之權門。而名成功立。厚加爵封。今臣還督本土。糾舉諸郡。絕交離親。戮辱舊故。衆謗陰害。固其宜也。臣雖汙穢。廉潔無聞。今見覆沒。恥痛實深。傳稱鹿死不擇音。謹冒昧略。後漢書

薦中郎將張奐自代疏

臣聞人無常俗。而政有治亂。兵無彊弱。而將有能否。伏見中郎將張奐。才略兼優。宜正元帥。以從衆望。若猶謂恐臣宜充軍事者。願乞冗官。以爲奐副。後漢書

請坐黨人奏

臣前薦故大司農張奐是附黨也。又臣昔論輸左校時。太學生張鳳等上書訟臣。是爲黨人所附也。臣宜坐之。後漢書

永康元年對策

天之於王者。如君之於臣。父之於子也。誠以當祿。使從福祥。陛下八年之中。三斷大獄。一除內嬖。再誅外臣。而當異猶見。人情未安者。殆賢愚進退。威刑所加。有非其理也。前太尉陳蕃。劉矩。忠謀高世。廢在里巷。劉祐。馮緄。趙典。尹勳。正直多怨。流放家門。李膺。王暢。孔翊。絜身守禮。終無宰相之階。至於鉤黨之釁。事起無端。虐賢傷善。哀及無辜。今興改善政。易於覆手。而羣臣杜口。鑒畏前害。互相瞻顧。莫肯正言。伏願陛下暫留聖明。容受審直。則前責可弭。後福必降。後漢書

謝趙壹書

樹按後漢書。壹上計西還。過弘農。候太守皇甫規。門者不卽通。壹遂遁去。規聞大驚。追書謝過。壹報之。遂去不顧。

蹉跌不面。企德懷風。虛心委質。爲日久矣。側聞仁者。愍其區區。冀承清誨。以釋遙悚。今且外白。有一尉兩計吏。不道屈尊門下。更啓乃知已去。如印綬可投。夜豈待旦。惟君明恕。平其夙心。寧當慢傲。加於所天。事在悖惑。不足具責。儻可原察。追修前好。則何福如之。謹遣主簿奉書。下筆氣結。汗流竟趾。後漢書

與劉司空牋

明公至德。佐國憂世。蒙贈兩梁冠及鮎魚一雙。服厚尊貺。榮施其弘。載文類聚太平御覽

與馬融書

謹遣掾吏許尚奉書。裁上絮被一雙。襪一量。以通微意。北堂書鈔。意作心。一作忱。

女師箴

觀象制教。肇經乾坤。家有王義。室有嚴君。各有定位。陰陽是分。昔在軒轅。陶化正刑。刑於壺闈。以臨百官。煌煌后妃。玄統是閑。穆穆夫人。爰採絮繫。師禮莫遠。而神罔時。怨關雖首化。萬國承流。實有淑女。允作好逑。唐媛興婚。文母盛周。德音不回。弘濟大綏。咨爾庶妃。鑿輅斯邁。戰戰兢兢。厲省繫帶。漸進不形。變起無外。行難著而易喪。事易失而難退。勳若順流。應如發機。奉上惟敬。撫下惟慈。怨豈在明。患生不思。初學記

與張奐書

從兄祕書。它何動靜。太平御覽

附錄

報皇甫規書

趙壹

君學成師範。縉紳歸慕。仰高希曠。歷年茲多。旅轅兼道。渴於言侍。沐浴晨興。昧旦守門。實望仁兄。昭其縣遲。以貴下賤。握髮垂接。高可敷翫。墳典起發。聖意下則抗論。當世消弭。時當豈悟。君子自生。怠倦失恂。恂

善誘之德。同亡國驕惰之志。蓋見幾而作。不俟終日。是以夙退自引。畏使君勞。昔人或歷說而不遇。或思仕而無從。皆歸之於天。不尤於物。今壹自譴而已。豈敢有猜仁君。忽一匹夫。於德何損。而遠辱手筆。追路相尋。誠足愧也。壹之區區。曷云量已。其嗟可去。謝也可食。誠則頑薄。實識其趣。但關節疾動。藜炙壤漬。請俟他日。乃奉其情。輒誦來貺。永以自慰。後漢書

薦皇甫規疏

蔡邕

臣聞唐虞以師師成熙。周文以濟濟爲寧。區區之楚。猶用賢臣爲寶。衛多君子。季札知其不危。由此言之。忠臣賢士。國家之元龜。社稷之楨固也。昔孝文愠匈奴之生事。思李牧於前代。孝宜忿奸邪之不散。舉張敞於亡命。況在於當時。謙虛爲臯。而可遺棄。臣伏見護羌校尉皇甫規。少明經術。道爲儒宗。修身力行。忠亮闡著。出處抱義。皦然不污。藏器林藪之中。以辭徵召之寵。先帝嘉之。羣公歸德。盜發東岳。莫能櫻討。卽起家拜爲太山太守。屠斬桀黠。綏撫羸弱。青兗之郊。迄用康艾。自是以來。方外有事。戎狄猾華。進簡前勳。連見委任。仗節舉麾。威靈盛行。演化凶悍。使爲慤愿。愛財省穡。每有餘資。養士御衆。悅以忘死。論其武勞。則漢室之干城。課其文德。則皇家之腹心。誠宜試用。以廣振鷺西靡之美。臣以頑愚。忝汚顯列。輒流汗墨。不堪之責。不勝區區。執心所見。越職警言。臯當萬死。唯陛下留神省察。臣邕頓首頓首。蔡中郎集

皇甫事蹟

後漢書王符傳。度遼將軍皇甫規解官歸安定。鄉人有以貨得雁門太守者。亦去職還家。書刺謁規。規臥不迎。既入而問卿前在郡食雁美乎。有頃。又白王符在門。規素聞符名。乃驚遽而起。衣不及帶。屣履出迎。援符手而還。與同坐極歡。時人爲之語曰。徒見二千石。不如一縫掖。言書生道義之爲貴也。

楊震傳。楊秉上書乞檻車徵濟陰太守單匡等。考覈其事。則姦慝蹤緒。必可立得。而秉竟坐輪坐左校。以久旱赦出。會日食。太山太守皇甫規等訟秉忠正。不宜久抑不用。有詔公車徵秉。

陶潛羣輔錄引魏文帝二十四賢狀云。規少有歧嶷正直之節。對策指刺黃門。梁冀不能用。退隱山谷。敦樂詩書。

後漢書桓帝紀延熹四年。先零沈氏羌與諸種羌寇并涼二州。十一月。中郎將皇甫規擊破之。後漢書列女傳。安定皇甫規妻者。不知何氏女也。規初喪室家。後更娶之。妻善屬文。能草書。時爲規答書。記衆人怪其工。及規卒時。妻年猶盛而容色美。後董卓爲相國。承其名。聘以駟輜百乘。馬二十疋。奴婢錢帛充路。妻乃輕服詣卓門。跪自陳情。辭甚酸愴。卓使傅奴侍者悉拔刀圍之。而謂曰。孤之威教。欲令四海風靡。何有不行於一婦人乎。妻知不免。乃立罵卓曰。君羌胡之種。毒害天下。猶未足耶。妾之先人清德奕世。皇甫氏文武上才。爲漢忠臣。君親非其趣。使走走吏乎。敢欲行非禮於爾君夫人邪。卓乃引車庭中。以其

頭縣稅鞭撲交下。妻謂持杖者曰：何不重乎？速盡爲惠。遂死車下。後人圖畫號曰禮宗云。

後漢書皇甫嵩，字義真，安定朝那人。度遼將軍規之兄子也。父節，雁門太守。嵩少有文武志介，好詩書，習弓馬。初舉孝廉，茂才。太尉陳蕃、大將軍竇武，連辟並不到。靈帝公車徵爲議郎。邊北地太守，初，鉅鹿張角自稱大賢良師，奉事黃老道，畜養弟子，跪拜首過符水，呪說以療病，病者頗愈。百姓信向之。角因遣弟子八人使於四方，以善道教化天下，轉相誑惑，十餘年，衆徒數十萬，連結郡國。自青、徐、幽、冀、荆、揚、兗、豫八州之人，莫不畢應。遂置三十六方，猶將軍號也。大方萬餘人，小方六七千，各立渠帥，訛言蒼天已死，黃天當立。歲在甲子，天下大吉，以白土書京城寺門及州郡官府，皆作甲子字。中平元年，大方馬元義等先收荆揚數萬人，期會發於鄴。元義數往來京師，以中常侍封譖、徐奉等爲內應。約以三月五日內外俱起，未及作亂，而張角弟子濟南唐周上書告之。於是車裂元義於洛陽，靈帝以周章下三公司隸，使鉤盾令周斌將三府掾屬案驗宮省直衛及百姓有事角道者，誅殺千餘人。推考冀州，逐捕角等。角等知事已露，晨夜馳勅諸方，一時俱起，皆著黃巾爲標幟。時人謂之黃巾，亦名爲蛾賊。殺人以祠天。角稱天公將軍，角弟寶稱地公將軍，寶弟梁稱人公將軍。所在燔燒官府，劫掠聚邑。州郡失據，長吏多逃亡。旬日之間，天下響應。京師震動，詔勅州郡修理攻守，簡練器械，自函谷、大谷、廣城、伊闕、轅轅、旋門、孟津、小平津諸關，並置都尉，召羣臣會議。嵩以爲宜解黨禁，益出中藏錢，西園廐馬，以班軍士。帝從之。於是發天下精兵，博選將帥，以嵩爲左中郎將，持節與右中郎將朱雋共發五校三河騎士及募精勇，合四萬餘人。嵩、雋各統一軍。

共討潁川黃巾。雋前與賊波才戰。戰敗。嵩因進保長社。波才引大衆圍城。嵩兵少。軍中皆恐。乃召軍吏謂曰。兵有奇變。不在衆寡。今賊依草結營。易爲風火。若因夜縱燒。必大驚亂。吾出兵擊之。四面俱合。田單之功可成也。其夕。遂大風。嵩乃約勅軍士。皆束苴乘城。使銳士間出圍外。縱火大呼。城上舉燎應之。嵩因鼓而奔其陳。賊驚亂奔走。會帝遣騎都尉曹操將兵適至。嵩操與朱雋合兵更戰。大破之。斬首數萬級。封嵩都鄉侯。嵩雋乘勝進討汝南陳國黃巾。追波才於陽翟。擊彭脫於西華。並破之。餘賊降散。三郡悉平。又進擊東郡黃巾。卜已於倉亭。生禽卜已。斬首七千餘級。時北中郎將盧植及東中郎將董卓討張角。並無功而還。乃詔嵩進兵討之。嵩與角弟梁戰於廣宗。梁衆精勇。嵩不能尅。明日。乃閉營休士。以觀其變。知賊意稍懈。乃潛夜勒兵。雞鳴馳赴其陳。戰至晡時。大破之。斬梁獲首三萬級。赴河死者五萬許人。焚燒車重三萬餘兩。悉虜其婦孺。繫獲甚衆。角先以病死。乃剖棺戮尸。傳首京師。嵩復與鉅鹿太守馮翊郭典攻角弟寶於下曲陽。又斬之。首獲十餘萬人。築京觀於城南。卽拜嵩爲左車騎將軍。領冀州牧。封槐里侯。食槐里美陽兩縣。合八千戶。以黃巾旣平。故改年爲中平。嵩奏請冀州一年田租以贍飢民。帝從之。百姓歌曰。天下大亂。今市爲墟。母不保子。父妻失夫。賴得皇甫。今復安居。嵩溫郵士卒。甚得衆情。每軍行。頓止。須營幔修立。然後就舍帳。軍士皆食已。乃嘗飯。吏有因事受賂者。嵩更以錢物賜之。吏懷慙。或至自殺。嵩旣破黃巾。威震天下。而朝政日亂。海內虛困。故信都令漢陽閻忠。千說嵩曰。難得而易失者。時也。時至不旋踵者。幾也。故聖人順時以動。智者因幾以發。今將軍遭難得之運。蹈易駭之機。而踐運不撫。臨機不發。將何以

保大名乎。嵩曰：何謂也？忠曰：天道無親，百姓與能。今將軍受鉞於莫春，收功於未冬，兵動若神，謀不再計，推強易於折枯，消堅甚於湯雪，旬月之間，神兵電掃，封尸刻石，南向以報威德，震本朝，風聲馳海外，雖湯武之舉，未有高將軍者也。今身建不賞之功，體兼高人之德，而北面庸主，何以求安乎？嵩曰：夙夜在公，心不忘忠，何故不安？忠曰：不然。昔韓信不忍一餐之遇，而弄三分之業，利劍以揣其喉，方發悔毒之歎者，機失而謀乖也。今主上勢弱於劉項，將軍權重於淮陰，指擣足以振風電，叱咤可以興雷霆，赫然奮發，因危抵釁，崇恩以綏先附，振武以臨後服，徵冀方之士，勦七州之衆，羽檄先馳於前，大軍響振於後，蹈流漳河，飲馬孟津，誅闖官之罪，除羣凶之積，雖僮兒可使奮拳，以致力，女子可使褰裳，以用命，况厲熊羆之卒，因迅風之勢哉？功業已就，天下已順，然後請呼上帝，示以天命，混齊六合，南面稱制，移寶器於將興，推亡漢於已墜，實神機之至會，風發之良時也。夫既朽不雕，衰世難佐，若欲輔難佐之朝，雕朽敗之木，是猶逆坂走丸，迎風縱棹，豈云易哉？且今豎宦羣居，同惡如市，上命不行，權歸近習，昏主之下，難以久居，不賞之功，讒人側目，如不早圖，後悔無及。嵩懼曰：非常之謀，不施於有常之執，創圖大功，豈庸才所致？黃巾細孽，敵非秦項，新結易散，難以濟業。且人未忘主，天不祐逆，若虛造不冀之功，以速朝夕之禍，孰與委忠本朝，守其臣節？雖云多讒，不過放廢，猶有令名，死且不朽，反常之論，所不敢聞。忠知計不用，因亡去。英雄記曰：環州賊王國等起兵，劫忠爲主，統三十六郡。號車騎將軍，忠感傷發病死。會辨章韓遂作亂，隴右明年春，詔嵩迴鎮長安，以衛園陵。章等遂復入寇，三輔使嵩因討之。初，嵩討張角，路由鄴，見中常侍趙忠舍宅險制，乃奏沒入之。又中常侍張讓私求錢五千

萬嵩不與。二人由此爲憾。奏嵩連戰無功。所費者多。其秋徵還。收左車騎將軍印綬。削戶六千。更封都鄉侯二千戶。五年。梁州賊王國圍陳倉。復拜嵩爲左將軍。督前將軍董卓各率二萬人拒之。卓欲速進。赴陳倉。嵩不聽。卓曰。智者不後時。勇者不留決。速救則城全。不救則城滅。全滅之勢在於此也。嵩曰。不然。百戰百勝。不如不戰而屈人之兵。是以先爲不可勝。以待敵之可勝。不可勝在我。可勝在彼。彼守不足。我攻有餘。有餘者動於九天之上。不足者陷於九地之下。今陳倉雖小。城守固備。非九地之陷也。王國雖強。而攻我之所不救。非九天之勢也。夫勢非九天。攻者受害。陷非九地。守者不拔。國今已陷受害之地。而陳倉保不拔之城。我可不煩兵勦衆而取全勝之功。將何救焉。遂不聽。王國圍陳倉。自冬迄春八十餘日。城堅守固。竟不能拔。賊衆疲敝。果自解去。嵩進兵擊之。卓曰。不可。兵法窮寇勿追。歸衆勿迫。今吾追國。是迫歸衆。追窮寇也。困獸猶鬪。蜂蟻有毒。況大衆乎。嵩曰。不然。前吾不擊。避其銳也。今而擊之。待其衰也。所擊疲師。非歸衆也。國衆且走。莫有鬪志。以整擊亂。非窮寇也。遂獨進擊之。使卓爲後拒。連戰大破之。斬首萬餘級。國走而死。卓大慙恨。由是忌嵩。明年卓拜爲并州牧。詔使以兵委嵩。卓不從。嵩從子酈時在軍中。說嵩曰。本朝失政。天下倒懸。能安危定傾者。唯大人與董卓耳。今怨隙已結。勢不俱存。卓被詔委兵。而上書自請。此逆命也。又以京師昏亂。躊躇不進。此懷奸也。且其凶戾無親。將士不附。大人今爲元帥。杖國威以討之。上顯忠義。下除凶害。此桓文之事也。嵩曰。專命雖罪。專誅亦有責也。不如顯奏其事。使朝廷裁之。於是上書以聞。帝讓卓。卓尤增怨於嵩。及後秉政。初平元年。乃徵嵩爲城門校尉。因欲殺之。嵩將行。長史梁衍說

曰漢室微弱。閹豎亂朝。董卓雖誅之而不能盡忠於國。遂復寇掠京邑。廢立從意。今徵將軍。大則危禍。小則困辱。今卓在洛陽。天子來西。以將軍之衆。精兵三萬。迎接至尊。奉令討逆。發命海內。徵兵羣帥。袁氏逼其東。將軍迫其西。此成禽也。嵩不從。遂就徵。有司承旨。奏嵩下吏。將遂誅之。嵩子堅壽與卓素善。自長安亡走洛陽。歸投於卓。卓方置酒歡會。堅壽直前質讓。責以大義。叩頭流涕。坐者感動。皆離席請之。卓乃起。率與其坐。使免嵩囚。復拜嵩議郎。遷御史中丞。及卓還長安。公卿百官迎謁道次。卓風令御史中丞以下皆拜以屈嵩。旣而抵手言曰。義真備未乎。嵩笑而謝之。卓乃解釋。獻帝春秋曰。初卓爲前將軍。嵩爲左將軍。俱征遼。卓韓遂。爭雄。及嵩拜車下。卓曰。可以服未。嵩曰。安知明公乃至於此。是卓曰。鴻鵠固有遠志。但燕雀自不知耳。嵩曰。昔與明公俱爲鴻鵠。但明公今日變爲風耳。及卓被誅。以嵩爲征西將軍。又遷車騎將軍。其年秋。拜太尉。冬。以流星策免。復拜光祿大夫。遷太常。尋李傕作亂。嵩以病卒。贈驃騎將軍印綬。拜家一人爲郎。嵩爲人愛慎。盡勤。前後上表陳諫。有補益者五百餘事。皆手書。毀草。不宣于外。又折節下士。門無留客。時人皆稱而附之。堅壽亦顯名。後爲侍中。辭不拜。病卒。